

**UCAPAN
YAB DATO' SERI ABDULLAH BIN HAJI AHMAD BADAWI
SEMASA MEMBENTANGKAN USUL MERAKAMKAN PERASAAN DUKACITA DI
ATAS KEMBALINYA KE RAHMATULLAH ALLAHYARHAM TUN ABDUL GHAFAR
BIN BABA DAN UCAPAN TAKZIAH KEPADA KELUARGANYA
DI DEWAN RAKYAT, KUALA LUMPUR
24 APRIL 2006**

TUAN YANG DI'PERTUA,

1. SAYA BERDIRI DI DEWAN YANG MULIA INI UNTUK MENGEMUKAKAN SATU USUL SEPERTI BERIKUT:

"BAHAWA DEWAN INI,

MERAKAMKAN PERASAAN DUKACITA YANG AMAT SANGAT DI ATAS KEMBALINYA KE RAHMATULLAH ALLAHYARHAM TUN ABDUL GHAFAR BIN BABA, BEKAS TIMBALAN PERDANA MENTERI PADA 23 APRIL 2006;

NEGARA TELAH KEHILANGAN SEORANG NEGARAWAN DAN PEJUANG YANG TIDAK DAPAT DIHITUNG JASANYA KEPADA MASYARAKAT DAN TOKOH SEPERTI ALLAHYARHAM SUKAR DICARI GANTI. ALLAHYARHAM MEMPERLIHATKAN KEMATANGAN DAN SENTIASA MENYAMPAIKAN SUARA KESEIMBANGAN TERUTAMANYA DALAM PERKARA-PERKARA YANG SENSITIF YANG MENYENTUH AGAMA, KAUM BUDAYA DAN BANGSA. ALLAHYARHAM ADALAH PEMIMPIN YANG SENTIASA KOMITED UNTUK BERKHIDMAT PADA RAKYAT DAN NEGARA TANPA MENGIRA PENAT LELAH, AGAMA, BANGSA DAN STATUS SOSIAL. SEMOGA ALLAH S.W.T. SENTIASA MENCUCURI RAHMAT KE ATAS ROHNYA DAN MELETAKKANNYA BERSAMA-SAMA ORANG YANG BERIMAN; DAN

MENYAMPAIKAN UCAPAN TAKZIAH KEPADA KELUARGANYA."

2. PADA PAGI 23 APRIL 2006, NEGARA DISELUBUNGI BERITA HIBA, BAHAWA TUN ABDUL GHAFAR BIN BABA TELAH KEMBALI KE RAHMATULLAH PADA JAM 7.35 PAGI DI PUSAT PERUBATAN GLENEAGLES, KUALA LUMPUR.

3. PADAMLAH SATU KANDIL NEGARA YANG SEPANJANG HAYATNYA MENYALAKAN CAHAYA UNTUK MENERANGI KEHIDUPAN BANGSANYA. ALLAHYARHAM LAHIR DALAM KELUARGA MISKIN TETAPI KEMISKINAN TIDAK MENGHALANGNYA MENCIPTA KEJAYAAN; MALAH KEMISKINAN ITU MENJADI SUMBER KEKUATAN YANG MENJADIKAN ALLAHYARHAM KAYA DENGAN PENGALAMAN DAN KUKUH DENGAN KEAZAMAN HINGGA SAMPAI KE PERINGKAT YANG DIKTIRAF SEBAGAI SEORANG NEGARAWAN.

4. TUN ABDUL GHAFFAR BIN BABA (ALLAHYARHAM), SEORANG TOKOH NEGARA DAN TOKOH BANGSANYA. SEBAHAGIAN BESAR HAYATNYA DIABADIKAN UNTUK BERKHIDMAT KEPADA NEGARA BANGSANYA. SETIAP TANGGUNG JAWAB YANG DIAMANAHKAN DIPENUHI DENGAN PENUH KOMITMEN, DILAKSANAKAN SECARA GIGIH. ALLAHYARHAM ADALAH ANAK MELAYU DARI SEBUAH PERKAMPUNGAN MELAYU TETAPI MEMILIKI PEMIKIRAN TERBUKA HINGGA DITERIMA KEIKHLASANNYA SEBAGAI PEMIMPIN OLEH SETIAP WARGA MALAYSIA DARI PELBAGAI AGAMA DAN KAUM.

5. DI KALANGAN ORANG MELAYU, ALLAHYARHAM DIKENALI SEBAGAI SUARA MELAYU YANG SENANTIASA MENJADI JURUBICARA, MELUAHKAN DENYUT NADI DAN DENYUT HATI INSAN MELAYU, TERUTAMA DARI KALANGAN RAKYAT MISKIN, DARI KALANGAN PETANI DAN NELAYAN DI DESA SERTA DARI KALANGAN PEKERJA DAN RAKYAT BIASA DI BANDAR. ALLAHYARHAM DIKENALI SEBAGAI SUARA YANG SENANTIASA PEKA MENYAMPAIKAN PANDANGAN RAKYAT BIASA DAN RAKYAT BAWAHAN. PERDANA MENTERI KEDUA MALAYSIA, TUN ABDUL RAZAK (ALLAHYARHAM) PERNAH MENGATAKAN BAHAWA SUARA DAN PANDANGAN ALLAHYARHAM MERUPAKAN MAKLUM BALAS MEWAKILI KONSTITUSI MELAYU LUAR BANDAR SERTA RAKYAT GOLONGAN BAWAHAN TERHADAP PROGRAM-PROGRAM YANG INGIN DILAKSANAKAN OLEH KERAJAAN.

6. NAMUN KASIH SAYANG DAN PERHATIAN ALLAHYARHAM KEPADA INSAN MELAYU TIDAK PULA MENJADIKANNYA SEORANG YANG BERSIFAT EKSTREM. ALLAHYARHAM ANTARA PEMIMPIN YANG MENERIMA REALITI AKAN KOMPOSISI WARGA DI NEGARA INI TERDIRI DARI PELBAGAI AGAMA, KAUM, BUDAYA DAN BAHASA. ALLAHYARHAM SENANTIASA BERSUARA SEDERHANA, SUARA PERIMBANGAN YANG MENJADI 'STABILIZER', MEMPERLIHATKAN KEMATANGAN DAN SIFAT RASIONAL DALAM PENDIRIANNYA BEGITU JUGA KETIKA MENANGANI ISU-ISU SENSITIF MENYENTUH AGAMA, KAUM, BUDAYA DAN BAHASA. UNTUK ITU ALLAHYARHAM TELAH DAPAT MEMENUHI TANGGUNG JAWAB SEBAGAI SETIAUSAHA BARISAN NASIONAL SECARA BERKESAN, DITERIMA DAN DIHORMATI OLEH SEMUA KOMPONEN PARTI DARI PELBAGAI AGAMA DAN PELBAGAI KAUM. MALAH KETIKA MCA MENGHADAPI KRISIS KEPIMPINAN PADA TAHUN 1985, ALLAHYARHAM WALAUPUN BUKAN BERKETURUNAN CINA TELAH DITERIMA UNTUK MEMIMPIN PARTI TERSEBUT DALAM SATU TEMPOH TRANSISI.

7. TUN ABDUL GHAFFAR BIN BABA (ALLAHYARHAM) DILAHIRKAN PADA 18 FEBRUARI 1925, MULA AKTIF DALAM POLITIK SEJAK BERUSIA 15 TAHUN DENGAN MENYERTAI PERSATUAN MELAYU MUDA MELAKA DAN KEMUDIANNYA MENYERTAI UMNO PADA TAHUN 1951. DALAM TEMPOH HAYATNYA, ALLAHYARHAM PERNAH MENJAWAT JAWATAN KETUA MENTERI MELAKA DI ANTARA TAHUN 1959 KE OGOS 1967 DAN MERUPAKAN Pengerusi MARA YANG PERTAMA PADA TAHUN 1967. SEBAGAI Pengerusi MARA, ALLAHYARHAM TEKUN BERUSAHA MEREALISASIKAN IMPIAN TUN ABDUL RAZAK (ALLAHYARHAM) UNTUK MELAHIRKAN KUMPULAN PROFESIONAL DAN TEKNOKRAT MELAYU DENGAN MENGASASKAN PENUBUHAN KOLEJ MARA YANG KEMUDIANNYA MENJADI INSTITUT TEKNOLOGI MARA; DAN PADA HARI INI TELAH DITINGKATKAN KE TARAF UNIVERSITI TEKNOLOGI MARA. KEPEKAAN ALLAHYARHAM TERHADAP KEMISKINAN, TERUTAMA DI KALANGAN RAKYAT LUAR BANDAR MEMBUATKAN ALLAHYARHAM SENANTIASA MEMILIH UNTUK MEMIMPIN KEMENTERIAN BERKAITAN PEMBANGUNAN LUAR BANDAR ANTARA

TAHUN 1969 HINGGA TAHUN 1976, SEBELUM MEMILIH BERUNDUR DIRI DARI MENJADI ANGGOTA JEMAAH MENTERI. PADA 9 MEI 1986, ALLAHYARHAM MENERIMA TANGGUNG JAWAB SEBAGAI TIMBALAN PERDANA MENTERI DAN SEKALI GUS MEMEGANG PORTFOLIO MENTERI PEMBANGUNAN LUAR BANDAR SEBELUM MEMILIH MELETAKKAN JAWATAN BERKUAT KUASA PADA 16 OKTOBER 1993.

8. ALLAHYARHAM MEMBERIKAN PERKHIDMATAN KEPADA NEGARA, BANGSA DAN PARTI SEMASA SENANG DAN SEMASA SUSAH, BAIK KETIKA MEMEGANG JAWATAN PENTING DI DALAM KERAJAAN DAN PARTI MAHUPUN KETIKA MENJADI AHLI BIASA DAN TIDAK MEMEGANG SEBARANG JAWATAN. KESETIAAN ALLAHYARHAM ADALAH KEPADA PERJUANGAN DENGAN MEMBERI KHIDMAT SECARA KONSISTEN; DALAM MENGHULURKAN KHIDMAT ALLAHYARHAM SENANTIASA BERPEGANG KEPADA FALSAFAH 'ORANG SEMENDA'; 'DIJEMPUT DATANG – DISURUH PERGI'. KETIKA TIDAK LAGI MEMEGANG JAWATAN DALAM KERAJAAN, ALLAHYARHAM TERUS MENYOKONG DAN TAAT KEPADA PARTI DAN KEPADA KERAJAAN, DAN BERSEDIA MEMBERI PANDANGAN DAN NASIHAT APABILA DIPERLUKAN.

9. ITULAH SIFAT NEGARAWAN YANG TELAH DIBUKTIKAN OLEH ALLAHYARHAM YANG WAJAR DIJADIKAN CONTOH IKUTAN. NEGARA DAN BANGSA TELAH KEHILANGAN NEGARAWAN BERNAMA ABDUL GHAFAR BIN BABA; YANG PERNAH MENJADI ANGGOTA DEWAN YANG MULIA INI SELAMA 35 TAHUN, YANG TERAKHIR MEWAKILI KAWASAN PARLIMEN BATU BERENDAM DARI TAHUN 1999 HINGGA KE TAHUN 2004. JASA DAN KHIDMAT BAKTINYA AKAN TERPAHAT DALAM SEJARAH NEGARA. DEWAN INI MERAKAMKAN PENGHARGAAN SETINGGI-TINGGINYA ATAS JASA, KHIDMAT DAN BAKTI YANG TELAH TUN ABDUL GHAFAR BIN BABA (ALLAHYARHAM) SUMBANGKAN KEPADA NEGARA DAN BANGSA. SEMOGA SEGALA PENGORBANAN DAN PERKHIDMATAN ALLAHYARHAM DITERIMA OLEH ALLAH SUBHANAHU WATAALA SEBAGAI AMAL YANG DIBERIKAN GANJARAN. SEMOGA ALLAHYARHAM DICUCURI RAHMAT DAN DITEMPATKAN DI KALANGAN PARA SOLEHIN, DI KALANGAN ORANG-ORANG SOLEH YANG BANYAK BERJASA DAN BERAMAL.

10. BAGI PIHAK KERAJAAN DAN RAKYAT MALAYSIA, DENGAN RASA PENUH HIBA SAYA MENYAMPAIKAN UCAPAN TAKZIAH KEPADA KELUARGA ALLAHYARHAM. NEGARA DAN RAKYAT AMAT BERTERIMA KASIH KEPADA AHLI-AHLI KELUARGA ALLAHYARHAM KERANA PENGORBANAN MEREKA, MERELAKAN ALLAHYARHAM MEMPERUNTUKKAN SEBAHAGIAN BESAR DARI USIA DAN KEHIDUPAN UNTUK BERKHIDMAT KEPADA NEGARA DAN BANGSA. KITA SAMA-SAMA BERDUKACITA DAN BERSIMPATI ATAS KESEDIHAN YANG DIRASAKAN OLEH AHLI-AHLI KELUARGA MENGIKUTI SAAT-SAAT AKHIR HAYAT ALLAHYARHAM DAN AKHIRNYA MENERIMA DENGAN REDZA TAKDIR ILAHI. SAYA MENDOAKAN SEMOGA KELUARGA ALLAHYARHAM DIBERIKAN KETABAHAN, KESABARAN DAN KETENANGAN MENGHADAPI UJIAN ILAHI.

TUAN YANG DI'PERTUA, SAYA MOHON MENCADANGKAN.